

# ତେସଲନୀକିୟ ମଣ୍ଡଳୀର ବିଶ୍ୱାସୀମାନଙ୍କୁ ପାଉଲଙ୍କର ଦ୍ୱିତୀୟ ପତ୍ର ୨ ଯ ଡେସଲନୀକିୟ ମଣ୍ଡଳୀର ବିସ୍ୱାସୀମାନଙ୍କେ ପାଉଲ୍ ଦୁଇପାଲି ଚିଠି ଲେଖିଲାଟା

## ଏ ବଇର ବିସଇ ଜାନବାଟା

୨ ଯ ଡେସଲନୀକିୟ ବଇ ଡେସଲନୀକିୟ ମଣ୍ଡଳୀତେଇ ଲେଖିଲା ଦୁଇ ପାଲି ଜାଇରଇଲା ଚିଠି । ଏ ଚିଠି ପେରିତ୍ ପାଉଲ୍ ଲେକାଇରଇଲା ୧:୧ । ୧ ମ ଡେସଲନୀକିୟର୍ ଦାପେ ଦାପେସେ କିରିସ୍ଟ ଜନମ୍ କରି ୫୧ ବରସ୍ ଗାଲା ପତେ ଏ ଚିଠି ଲେକି ରଇଲା । ଡେସଲନୀକି ମଣ୍ଡଳୀକେ ଚିଠି ଲେଖିଲା ବେଲେ ପାଉଲ୍ କରନ୍ତ୍ରିୟ ମଣ୍ଡଳୀତେଇ ରଇଲା । ଜନ୍ ମଣ୍ଡଳୀକେ କି ସେ ମିସ୍ନାରି ଇସାବେ ଦୁଇ ପାଲି ଗାଲାବେଲେ ଗଡ଼ି ରଇଲା ପେରିତ୍ ୧୭:୧-୧୦ ।

କେତେଟା ଜିଉଦିମନ୍ ଆରି କେତେଟା ଗିରିକ୍ ଲକ୍ମନର୍ ଲାଗି ଏ ମଣ୍ଡଳୀ ତାପ୍ନା ଅଇଲା ଆତେ ବଲି ପେରିତ୍ ବଇଟାନେ କଇଲାଅଟତ୍ । ଡେସଲନୀକି ମଣ୍ଡଳୀ ଲେକାଅଇରଇବା ଚିଠିଟାନେ କିରିସ୍ଟ ଆରିତରେକ୍ ଆଇବାଟା ଆରି ସାରାସାରିବେଲାର୍ ବିସଇ ଲେକାଅଇଲାଆତେ । କାଇକେବଇଲେ ପାଉଲ୍ ତାର୍ ଚିଠିଟାନେ ଏ ଦୁଇଟା ଜାକ ଡେସଲନୀକି ମଣ୍ଡଳୀକେ ଲେକିଆତେ । ୨ ଯ ଡେସଲନୀକିୟଟାନେ ଲେକାଉଇବା ବିସଇ ପାକାପାକି ଅଦା ବିସଇ ସାରାସାରିବେଲା ବିସଇରେସେ ଆତେ । ପାଉଲ୍ ଅଲ୍ସିଆ ବିସଇନେଇ ମିସା ତରିକ୍ନା କରାଇଲାନ୍ତି । ସବୁ ମୁନୁସ୍ ଜାତି ସେମନର୍ କାଦିର୍ ପାଇ ପାଇଟିକାବାଡ଼ କର୍ବାର୍ ଆତେ ୩:୬-୧୦ ।

## ଏ ବଇ ବିତ୍ରେ ରଇବାଟା

୧. ପାଉଲ୍ ତାର୍ ଚିଠିଟାନେ ତାର୍ ନିଜର୍ ମଇତର୍ମନକେ ଚିନାର୍ ଜାନାର୍ କରାଇ ଆରାମ୍ କଲାନ୍ତି । ୧:୧-୨

- ୨. ଡେସଲନିକି ମଣ୍ଡଳିର ପାଇ ପରମେସରକେ ଦନିଅବାଦ୍ ଦେଲାନି ଆରି ପାରତନା କଲାନି । ୧:୩-୧୨
- ୩. ୨ ଯୁ ଅଦିଆଇ ଜଗତର୍ ସାରାସାରି ବେଲାର୍ ବିସଇ କଇଲାନି । ୨:୧-୧୭
- ୪. ସେ ଅଲସକେ ବିରଦ୍ କଲାନି ଆରି ପାଇଟିକାବାଡ୍ କର୍ବା ବିସଇ କଇଲାନି । ୩:୧-୧୫
- ୫. ପାଉଲ୍ ଆରିତରେକ୍ ମଣ୍ଡଳିର ଲକ୍ମନକେ ଜୁଆର୍ ଜାନାଇକରି ସାରାଇଲାନି । ୩:୧୬-୧୮

<sup>୧</sup> ଫୁଇ ପାଉଲ୍, ବାବା ପରମେସର ଲଗେ ଆରି ମାପୁରୁ ଜିସୁକିରିସ୍ତ ଡେଇ ରଇବା ଡେସଲନିକିୟ ମଣ୍ଡଳିର ଲକ୍ମନକେ ଏ ଚିଟି ଲେକି ପାଟାଇଲିନି । ମର୍ ସଙ୍ଗ୍ ରଇକରି ସିଲା ଆରି ତିମତି ମିସା ଜୁଆର୍ ଜାନାଇଲାଇନି ।

<sup>୨</sup> ଆମର୍ ବାବା ପରମେସର ଆରି ମାପୁରୁ ଜିସୁକିରିସ୍ତ ତମକେ ଜିବନ୍ ଦୁକାଇ ସାନ୍ତି ଦେଅ ।

**ଜିସୁ ଆରିତରେକ୍ ଆସି ବିଚାର କର୍ବାଟା**

<sup>୩</sup> ଏ ବାଇବଇନିମନ୍ ତମର୍ପାଇ ଆମେ ପରମେସରକେ ସବୁବେଲେ ଦନିଅବାଦ୍ ଦେବା କାତା । ଏଟା ଚିକ୍ ବିସଇ । କାଇକେବଇଲେ ତମର୍ ବିସବାସ୍ ଅଦିକ୍ ଅଦିକ୍ ଅଇଲାନି । ଆରି ତମର୍ ନିଜର୍ ନିଜର୍ ବିତରେ ସବୁଲକ୍କେ ଆଲାଦ୍ ବଡିଗାଲାନି । <sup>୪</sup> ତମେ ଜେଡକି ସବୁ ଉଡାସୁନିକରି ମିସା ବିସବାସ୍ କରି ବପୁସଙ୍ଗ୍, ତାଟ୍ ଅଇକରି ଆଗାସ୍ । ଏ କାତା ଆମେ ପରମେସରର୍ ମଣ୍ଡଳିମନକେ ବଡ୍ପନ୍ ଅଇକରି କଇଲୁନି ।

<sup>୫</sup> ପରମେସରର୍ ଜନ୍ ରାଇଜର୍ପାଇ ତମେ ଦୁକ୍ କସ୍ତ ପାଇଲାସ୍ନି, ସେ ରାଇଜ୍ ପାଇସା । ପରମେସରର୍ ବିଚାର କର୍ବାଟା ଚିକ୍ ଆକା, ଇତିଅନି ସେଟା ଜାନିଅଇଲାନି । <sup>୬</sup> ଜନ୍ଟା ଚିକ୍, ସେଟା ପରମେସର ପୁରାପୁରୁନ୍ କର୍ସି । ଜନ୍ଲକ୍ମନ ଏବେ ତମକେ କସ୍ତ ଦେଲାଇନି, ସେମନ୍ କସ୍ତ ପାଇବାଇ । <sup>୭</sup> ପରମେସର ତମର୍ ଦୁକ୍ କସ୍ତ ଅଇବାଟା ସାରାଇକରି ଆମକେ ମିସା ସାନ୍ତି ଦେଇସି । ଜେଡେବେଲେ ମାପୁରୁ ଜିସୁ ସର୍ଗେଅନି ତାର୍ ବପୁର୍ ଦୁତମନର୍

---

☆ **୧:୧** ୧:୧ ପେରିଡ୍ ୧୭:୧

ମଜାଲ ବପୁଅଇ ଆଇସି, ପର୍ମେସର୍ ଏ କାମ୍ ପୁରାପୁରୁନ୍ କରସି ।<sup>୮</sup> ଜନ୍‌ଲକ୍‌ମନ୍ ପର୍ମେସର୍‌କେ ନାଜାନତ୍, ଆରି ଆମର୍ ମାପୁରୁ ଜିସୁର୍ ବାକିଅ ନ ମାନତ୍, ସେନ୍ତାରି ଲକ୍‌ମନ୍‌କେ ସେ ଡଣ୍ଟ ଦେବାକେ ଲାଗିତେରଇବା ଜଇସଙ୍ଗ୍ ଆଇସି ।<sup>୯</sup> ସେ ଲକ୍‌ମନ୍ ମାପୁରୁର୍ ମୁଆଟେ ଡାଟ୍‌ସଙ୍ଗ୍ ଡାକ୍‌ପୁଟା ପାଇବା ତେଇଅନି, କାଲ୍ କାଲ୍ ଜୁଗ୍ ଜୁଗ୍ ପାଇ କୁରୁପ୍‌ନାସ୍ ଅଇଜିବାଇ ।<sup>୧୦</sup> ସେଦିନେ ମାପୁରୁ ତାର୍ ଲକ୍‌ମନ୍‌ର୍ ଟାନେଅନି ଆରି ସବୁ ଲକ୍‌ମନ୍‌ର୍ ଟାନେଅନି ଡାକ୍‌ପୁଟା ଅଇ ସନ୍‌ମାନ୍ ପାଇସି । ଏମନ୍‌ର୍ ବିତ୍‌ରେ ତମେ ମିସା ମିସା । କାଇକେବଇଲେ ଆମେ ଜନ୍ କବର୍ ଦେଇରଇଲୁ, ସେଟା ତମେ ବିସ୍‌ବାସ୍ କଲାସ୍ ଆରି ମାନ୍‌ଲାସ୍ ।

<sup>୧୧</sup> ତମ୍‌କେ ଜେକ୍ତି ଜିଉନା କାଉନା କର୍‌ବାପାଇ ପର୍ମେସର୍ ବାଟ୍‌ଲା ଆଟେ, ସେନ୍ତାରି ଚଲାଟଲ୍‌ତି କରାଇବାକେ ଆମେ ପର୍ମେସର୍‌କେ ଗୁଆରି କଲୁନି । ସେ ତାର୍ ବପୁସଙ୍ଗ୍ ସବୁ ଆସା କର୍‌ବା ସତ୍ ପୁରାପୁରୁନ୍ କରି ତମର୍ ବିସ୍‌ବାସ୍ ଡାଟ୍ କର । ସେଟାର୍‌ପାଇ ଆମେ ସବୁବେଲେ ତମର୍‌ଲାଗି ପାର୍‌ତନା କଲୁନି ।<sup>୧୨</sup> ଏନ୍ତାରି କଲେ ଆମର୍ ସବୁଲକର୍ ପର୍ମେସର୍ ଆରି ମାପୁରୁ ଜିସୁକିରିସ୍‌ଟ ଜିବନ୍ ଦୁକାଇ ତମ୍‌କେ ମିସା ଡାକ୍‌ପୁଟା କରାଇସି । ଆରି ତମେ ମିସା ତାର୍‌ଟାନେ ଡାକ୍‌ପୁଟା ଅଇସା ।

## ୨

### କାରାପ୍ କର୍‌ବା ଲକ୍

<sup>୧</sup> <sup>୧</sup>ଏ ବାଇବଇନିମନ୍, ମାପୁରୁ ଜିସୁକିରିସ୍‌ଟ ଆରିତରେକ୍ ଆଇବା ବିସଇ ଆରି ତାର୍‌ଲଗେ ଆମେ ସବୁଲକ୍ ରୁଣ୍ଟିଅଇବା ବିସଇ, ତମ୍‌କେ ଆମେ ବାବୁଜିଆ କଲୁନି ।<sup>୨</sup> କାର୍‌ଲଗେଅନି ମିସା ମାପୁରୁର୍ ଦିନ୍ କେଟ୍‌ଲାବେ, ବଲିକରି ସୁନିଦେଇ କିଲ୍‌ବିଲ୍ ଉଆନାଇ । ଜଦି ସେ କବର୍ ଆମେ ବବିସତ୍‌କାତା କଇଲୁ କି ଜାନାଇଲୁ ନଇଲେ ଚିଟିଟାନେ ଲେକିଆଟତ୍ ବଲି ସୁନ୍‌ଲେ ମିସା ସେନ୍ତାର୍ ଉଆନାଇ ।<sup>୩</sup> କେ ମିସା ସେନ୍ତାରିକରି ତମ୍‌କେ ବୁଲ୍ ବାଟେ ନ ନେଅ । କାଇକେବଇଲେ ପର୍‌ଡୁମ୍ ଦରମର୍ ପାଇ ବିରଦ୍ ଅଇସି ।

☆ ୨:୧ ୨:୧ ୧ମ ଡେସଲନିକିୟ ୪:୧୫-୧୭

ତାରପତେ ବିନାସ୍ କରୁ ଜେ କି ପାପି ମୁନୁସ୍ ଆଇବା ଦରକାର । ସେ ପାପି ମୁନୁସ୍ ନ ସାର୍‌ବା ମରନେ ଜାଇସି ।<sup>୪</sup> ସେ ଦୁରାଚାର୍ ମୁନୁସ୍ ଜନ୍ ସବୁ ବିସଇ ପରମେସରର୍ ବଲି ଲକ୍‌ମନ୍ ପୁଜା କଲାଇନି, ସବୁରଟାନେଅନି ସେ ନିଜେ ମୁକ୍ତିଅ ବଲି କଇସି । ଜେନ୍ତି କି ପରମେସରର୍ ମନ୍ଦିରେ ବସିକରି ମୁଇ ଆକା ପରମେସର୍, ବଲି ଦେକାଇ ଅଇସି ।

<sup>୫</sup> ମୁଇ ତମର୍ ସଙ୍ଗ୍ ରଇଲାବେଲେ ତରକେ ତର୍ ଏ ସବୁ ବିସଇ ଏତାଇ ଦେଇତେ ରଇଲି । ସେଟା କାଇ ତମର୍ ମନେ ନାଇ କି ?  
<sup>୬</sup> ଅଇଲେମିସା ସେ ବିପଦ୍ ଏବେ ନ ଗଟେତା । କାଇକେବଇଲେ ତାରସଙ୍ଗ୍ ଜୁଜ୍‌ବାକେ ଏବେ ଗଟେକ୍ ବପୁ ଆଟେ । ସେଟା କାଇ ତମେ ଜାନାସ୍ କି ? ସମାନ୍ ବେଲାଇ ସେ କାରାପ୍ ଲକ୍ ବାରଇସି ।  
<sup>୭</sup> କାଇକେବଇଲେ ଏବେ ମିସା ଲୁଚ୍‌ତେ ଅନିଆଇର୍ ପାପ୍ କାମ୍ ଚାଲିଆଟେ । ଜନ୍ କାରାପ୍ ଲକ୍ ମାପୁରୁର୍ ବାଟେ ଜିବା ଲକ୍‌ମନ୍‌କେ ବିରଦ୍ କଲାନି, ସେ ଲକ୍ ବିନାସ୍ ନ ଅଇବା ଜାକ୍, ଏଟା ଏନ୍ତିସେ ଅଇତେରଇସି ।<sup>୮</sup> ସେଡ୍‌କିବେଲେ ସେ କାରାପ୍ ଲକ୍ ଦେକାଇ ଅଇସି । ତାକେ ମାପୁରୁ ଜିସୁ ତାର ନିଜର୍ ଟଣ୍ଡେଅନି ବାରଇବା ପୁଣ୍ଡା ସଙ୍ଗ୍ ନାସ୍ କର୍‌ସି । ଆରି ତରେକ୍ ସେ ତାକ୍‌ପୁଟା ସଙ୍ଗ୍ ଆଇବାବେଲେ ସେ କାରାପ୍ ଲକ୍ ବିନାସ୍ ଅଇଜାଇସି ।<sup>୯</sup> ସେ କାରାପ୍ ଲକ୍, ସଇତାନର୍ ବପୁ ପାଇକରି ଆଇସି । ଆରି କାବା ଅଇବା କାମ୍‌ମନ୍ କରି ଦେକାଇସି ।<sup>୧୦</sup> କେତେ କେତେ ଲକ୍‌ମନ୍ ସେ କର୍‌ବା କାମେ ଜାଇ କିଲ୍‌ବିଲ୍ ଅଇବାଇ ଆରି ନସ୍‌ଟ ଅଇଜିବାଇ । ଜନ୍ ସଡ୍ ମାନିକରି ସେବାଟେ ଗାଲେ, ସେମନ୍ ନ ସର୍‌ବା ଜିବନ୍ ପାଇତାଇ, ସେଟା ଚାଡିଦେଇରଇବା ଲାଗି ସେମନ୍‌କେ ଏ ଦସା ଅଇସି ।<sup>୧୧</sup> ସେମନ୍ ଜେନ୍ତିକି ମିର୍ କାତା ବିସ୍‌ବାସ୍ କର୍‌ବାଇ, ସେଟାର୍‌ପାଇ ପରମେସର୍ ସେମନ୍‌ରଟାନେ ସଡ୍ ନଇବା ବପୁ ପାଟାଇସି ।<sup>୧୨</sup> ଜେନ୍ତିକି ଜନ୍ ଲକ୍‌ମନ୍ ସଡ୍ ବିସଇ ବିସ୍‌ବାସ୍ ନ କରି ମିର୍ ବିସଇ ବିସ୍‌ବାସ୍ କରି ସାର୍‌ଦା ଅଇବାଇ, ସେମନ୍ ସବୁଲକ୍ ଏ ରକାମ୍ ଡଣ୍ଡୁ ପାଇବାଇ ।

### ବିସ୍‌ବାସେ ତବିର୍ ଅଇରଇବାର୍

<sup>୧୩</sup> ତେବର୍‌ପାଇ ଏ ବାଇବଇନିମନ୍, ତମର୍‌ପାଇ ସବୁବେଲେ ପରମେସର୍‌କେ ଦନିଅବାଦ୍ ଦେବାର୍ ଆଟେ । କାଇକେ ବଇଲେ

ପରମେସର୍ ତମ୍ଭେ ଆଲାଦ୍ କଲାନ୍ତି ଆରି ଆଗେଅନି ସେ ତମ୍ଭେ ବାଚ୍ଲା ଆତେ । ଜେନ୍ତୁକି ସେ ତମ୍ଭେ ରକିଆ କରି ପାର୍ସି । ସୁକଲ୍ ଆଡ଼ମାର୍ କାମର୍ ଲାଗି ତମ୍ଭେ ସୁକଲ୍ ଅଇ ସତ୍ ବିସଇ ବିସ୍ବାସ୍ କରି ପାର୍ସା । <sup>୧୪</sup> ଆମେ ତମ୍ଭେଟାନେ ଜନ୍ ନିମାନ୍ କବର୍ ଜାନାଇଆରୁ, ସେଟାରଲାଗି ପରମେସର୍ ତମ୍ଭେ ବାଚ୍ଲା ଆତେ । ଆମର୍ ମାପରୁ ଜିସୁ କିରିସ୍ଟର୍ ନାଉଁ ଡାକ୍ପୁଟା ଅଇବା ଟାନେ ମିସାଇବାକେ ବାଟିଆତେ । <sup>୧୫</sup> ତେବେ ଏ ବାଇବଇନିମନ୍, ତମ୍ଭେ ତବିର୍ ଅଇକରି ରୁଆ । ଆମେ ବାକିଅ ଦେଲାଟାନେ ଅନି, କି ଚିଟେଇ ଅନି ତମ୍ଭେ ଜନ୍ଟା ସିକିଆଟାସ୍, ସେ ସବୁ ଚାଡାନାଇ ।

<sup>୧୬</sup> ନିଜେ ଆମର୍ ମାପରୁ ଜିସୁ କିରିସ୍ଟ, ଆରି ଜନ୍ ଆମର୍ ବାବା ପରମେସର୍ ଆମ୍ଭେ ଆଲାଦ୍ କଲା, ସେ ଆକା ଆମ୍ଭେ ଜିବନ୍ ଦୁକାଇକରି କେବେ ନ ସାରବା ବପୁଆରି ଆସା ଦେଇଆତେ । <sup>୧୭</sup> ସେ ସବୁବେଲେ ସତ୍ କାମ୍ କର୍ବାକେ ଆରି ବାକିଅତେଇ ତବିର୍ ଅଇ ରଇବାକେ ସାଇଜ କର ।

## ୩

### ପାର୍ତନାର ଲାଗି ଗୁଆରି

<sup>୧</sup> ଏ ବାଇବଇନିମନ୍, ସାରାସାରି ଆମର୍ପାଇ ପାର୍ତନା କରା । ମାପରୁର୍ ବାକିଅ ତମର୍ ବିତ୍ରେ ଜେନ୍ତୁକି ଦାପ୍ରେ ଡାବିଅଇ ଜାଇରଇଲା, ସେନ୍ତାରିସେ ଦାପ୍ରେ ଗୁଲାଇବାଟେ ବିଚିଅଇକରି ଡାକ୍ପୁଟା ଅ । <sup>୨</sup> ଜେନ୍ତାରି କି ପରମେସର୍ ଆମ୍ଭେ ପଟ୍ଟକାର୍ ଆରି କୁଟିଆଲ୍ ଲକ୍ମନର୍ ଟାନେଅନି ରକିଆ କର । କାଇକେବଇଲେ, ସବୁଲକ୍ ମାପରୁର୍ ବାକିଅ ବିସ୍ବାସ୍ କରତ୍ ନାଇ । ଏଟାରପାଇ ଆରିତରେକ୍ ପାର୍ତନା କରା ।

<sup>୩</sup> ମାତର୍ ମାପରୁ, କାତା ରକିଆକାରି । ସେ ତମ୍ଭେ କାରାପ୍ଟାନେଅନି ରକିଆ କରି ତବିର୍ କରାଇସି । <sup>୪</sup> ଆମେ ଜେଡ୍ କି ସବୁ ଆଦେସ୍ ଦେଲେ ମିସା ତମେ ସେଟା କଲାସ୍ନି, ଆରି କର୍ସା ମିସା । ଏଟା ମାପରୁର୍ ଟାନେ ତମର୍ ବିସଇ ନେଇ ଆମେ ଡାଟ୍‌ସଙ୍ଗର୍ ବିସ୍ବାସ୍ ।

<sup>୫</sup> ଆରି ମାପରୁ ତମର୍ ମନ୍ତେ ପରମେସର୍ ଆଲାଦ୍ ଆରି କିରିସ୍ଟର୍ ସାଆସ୍ ବାଟେ ଜିବାକେ ସାଇଜ କର ।

### ଅଲସର୍ ବିରୁଦ୍ଧେ ଚେତାଇବାଟା

<sup>୬</sup> ଏ ବାଇବଇନିମନ୍, ଆମେ ତମ୍ଭେ ଆମର୍ ମାପୁରୁ ଜିସୁ କିରିସଟର୍ ନାଉଁ ଦାରି ଆଦେସ୍ ଦେଲୁନି । କନ୍ ବାଇ ମିସା ଆମର୍ଟାନେଅନି ପାଇରଇବା ସିକିଆ ଇସାବେ ମାନିକରି ବାଡୁଅଇକରି ଚଲାଚଲ୍ତି କରସି ବଇଲେ, ତାର୍ଟାନେଅନି ବେଗ୍ଲି ଦିଆସ୍ । <sup>୭</sup> କାଇକେବଇଲେ, ତମେ, ଆମେ କଲାପାରା କରବା ଦରକାର । ଆରି ସେଟା କେନ୍ତାରି କରବାର୍ ନିଜେ ଜାନିଆଟାସ୍ । ସେଟାର୍ପାଇ ଆମେ ତମର୍ ଟାନେ ବାଡୁଅଇକରି ଚଲାଚଲ୍ତି କରୁନାଇ ।<sup>୮</sup> କାର୍ ଗରେ ମିସା ଉଜେ ଉଜେ ମାଜି ନ କାଇତେରଇଲୁ । ତମର୍ ବିଡ୍ରେ କାର୍ମିସା ବଜ୍ ପାରା ନ ଅଇ ରଇକରି କସ୍ଟ ପାଇ, ଆବଡ୍ ପାଇଟି କରି ଦିନରାତି କାମ୍ କରତେରଇଲୁ । <sup>୯</sup> ତମ୍ଭେ କାଇବାଟା ମାଙ୍ଗବାକେ ଆମର୍ ଅଦିକାର ରଇଲା, ମାତର୍ ସେନ୍ତାରି କରୁନାଇ । କାଇକେବଇଲେ ତମର୍ପାଇ ଗଟେକ୍ ଉଦାଅରନ୍ ଦେକାଇବାକେ ସେନ୍ତାରି କଲୁ । <sup>୧୦</sup> ତମର୍ ସଙ୍ଗ୍ ରଇଲାବେଲେ ଆମେ ତମ୍ଭେ କଇରଇଲୁ, ଜନ୍ ଲକ୍ ପାଇଟି କାବାଡ୍ ନ କରେ, ସେ ବାଡ୍ପେଜ୍ ନ କାଅ ।

<sup>୧୧</sup> ଏବେ ଏ କାତା ଆରିତରେକ୍ କଇଲୁନି, କାଇକେବଇଲେ ଆମେ କବର୍ ପାଇଲୁ ଆରୁଜେ, ତମର୍ ବିଡ୍ରେ କେତେକ୍ ଲକ୍ମନ୍ ବାଡୁ ଅଇକରି ଜିଉନାକାଉନା କଲାଇନି । କାଇ ପାଇଟି ନକରି ବିନ୍ ଲକ୍ କାମେ ମଜାଇ ଅଇସି ଆରି କାଇଟାମିସା ନ କରଡ୍ । <sup>୧୨</sup> ମାପୁରୁ ଜିସୁକିରିସଟର୍ ନାଉଁ ଦାରି ଆମେ ସେ ଲକ୍ମନ୍କେ ଜାଗ୍‌ରଡ୍‌କରି ଆଦେସ୍‌ଦେଲୁନି, ସେମନ୍ ସେନ୍ତାରି କରବାଟା ଚାଡିଦେସ୍ । ଜେନ୍ତାରିକି ନିଜର୍ ପେଟର୍ପାଇ କାଦି ପାଇବାକେ ପାଇଟି କରଡ୍ ।

<sup>୧୩</sup> ମାତର୍ ଏ ବାଇବଇନିମନ୍ ତମେ ସଡ୍‌କାମ୍ କରବାକେ ତାକିଜାଆ ନାଇ । <sup>୧୪</sup> ଏ ଚିଟିଲଗେ ତମ୍ଭେ ଜନ୍ କବର୍ପାଟାଇଲୁ ଆରୁ, କେନ୍ତୁ ଆଲେ ତମର୍ ବିଡ୍ରେଅନି କେ ମିସା ସେଟା ମାନ୍‌ବାକେ ମନ୍ ନ କରେ, ସେନ୍ତାରି ଲକ୍‌କେ ଚିନିରୁଆ ଆରି ତାର୍‌ସଙ୍ଗ୍ ମିସିବିଡି ରଇବାଟା ଚାଡି ଦିଆସ୍ । <sup>୧୫</sup> ସେନ୍ତାର୍ କଲେ ସେ ଲାଜ୍ ଅଇଜାଇସି । ମାତର୍ ତାର୍‌ସଙ୍ଗ୍ ସଡ୍‌ରୁର୍ ପାରା କାତାବାର୍ତା ନ ଅଇକରି, ନିଜର୍ ବିସ୍‌ବାସି ବାଇପାରା ତାକେ ଜାଗ୍‌ରଡ୍ କରା ।

### ସାରାସାରି କାତା

<sup>୧୬</sup> ଜନ୍ମମାପରୁ ଆମ୍ଭଙ୍କେ ସାନ୍ତି ଦେଲାନି, ସେ ତମ୍ଭଙ୍କେ ସବୁବେଳେ ଆରି ସବୁରକାମ୍ ସାନ୍ତିଦେଅ । ମାପରୁ ତମ୍ଭର ସବୁରଲଗେ ରଅ ।

<sup>୧୭</sup> ମୁଇ ମର୍ ନିଜର୍ ଆତେ ଏଟା ଲେକ୍‌ଲିନି । ପାଉଲର୍ ଜୁଆର୍ ଜାନାଇଲୁନି । ମୁଇ ଲେକ୍‌ରଇବା ସବୁ ଚିଟିପତର୍ ଲଗେ ମୁଇ ଏନ୍ତାରି ଦସ୍‌ତକଡ଼ କରି ଲେକ୍‌ରଇବି ।

<sup>୧୮</sup> ଆମର୍ ମାପରୁ ଜିସୁକ୍‌ରିସ୍‌ଟର୍ ଜିବନ୍ ଦୁକାନି ତମ୍ଭଙ୍କେ ସବୁଙ୍କେ ମିଲ ।

**ସତ୍ତ୍ୱିୟ ବାବ୍**  
**The New Testament in the Desiya language of India:**  
**ସତ୍ତ୍ୱିୟ ବାବ୍ (Bible)**

copyright © 2020 The Word for the World International

Language: ଦେଶିଆ (Desiya)

Contributor: The Word for the World International

**ସତ୍ତ୍ୱିୟ ବାବ୍**  
**ଦ୍ୱିତୀୟା ନିୟମ, 2020**

The New Testament in Desiya Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 9 Apr 2023

cd4d7c1f-dc97-5fb4-a0ba-ab968fde9cde